



Tasiilami eqqaanilu suliffissaaleqinerit annikillisarinnisaannut, suliffissaqartitsinissamut, aammalu pilersuinnissamut isumannaallisaanissamut Naalakkersuisut iliuusissatut pilersaarummik suliaqaaqullugit peqquneqarnissaannik Inatsisartut aalajangiiffigisassaattut siunnersuut. Iliuusissatut pilersaarut upernaakkut 2027-mi ingerlanneqaleriissaaq.

(Inatsisartunut ilaasortaq Gerth Mikaelson, Naleraq)

(Siullermeerineq)

Inatsisartunut ilaasortap Gerth Mikaelsonip siunnersuutaanut qujanaq.

Nammineerlunga Tasiilameersuugama, unammillernartut siunnersuummi matumani qaqqinneqartut ilisimavakka. Unammillernartut ulluinnarni malugineqarsinnaasarput. Ilaqutariinni toqqissisimanermik maqaasisuni malugineqarsinnaasarput. Inuusuttuni ingerlaqqinnissaminnut ersarissunik aqutissaaruttuni, inunnilu sulerusuttuni, periarfissalli ikippallaarujussuarnerinik misigisartuni malugineqarsinnaasarput.

Suliffissaaleqineq aningaasaqarnermut tunngaannangilaq. Naleqassusermut, neriuteqarnermut, illoqarfigisallu siunissaqarneranut upperinninnermut tunngassuteqarpoq. Tamanna pillugu Tasiilami pisoq pimoortissavarput. Oqaasiinnaangitsukkut, kisiannili aalajngersimasunik aamma piviusorsiorpalaartunik aaqqiissuteqarnikkut.

Amerlanerusut suliffeqalernissaat, amerlanerusullu ilinniagaqalernissaminnut, ataatsimoornermullu tapersiissuteqarnissaminnut pereriarfissaqarnissaat Demokraatinut aalajangiisuuvoq. Kisianni aamma unneqqarissaagut. Iliuusissatut pilersaarut allatuulli allagaataaginnassangilaq sunniuteqanngitsoq. Najukkami ilisimasaniq aallaaveqassaaq, kommunimik, inuusutissarsiorpalaartunik aamma innuttaasunik akuutississaaq, suliniutinillu ilumut ingerlanneqarsinnaasunik tikkuassalluni.

Tasiilaq unammillernartitaqarpoq, kisianni aamma Tasiilaq nukittuffeqarpoq. Ilaatigut takornarialerinerup, sullissinerup, najukkami inuusutissarsiutit, piniarnerup, aalisarnerup, kulturillu iluini periarfissaqarpoq. Ineriartortitsinissamut, inunnullu akisussaaffimmik tiguserusuttunut aamma pilersitserusuttunut sinaakkutinik pitsaanerusunik pilersitsinissarput pisariaqarpoq.

Pilersuinerup isumannaatsuunera tassani aamma pingaaruteqaqataavoq. Ilaqutariit nerisassanik, pisariaqartunillu allanik pisisinnaassanerlutik nalornigaangata, tamanna toqqissisimannginnermik pilersitsisarpoq. Suliassaqarfimmi ataatsimut ineriartortitsinermut ilaatigullu pimoorussisumik tiguneqassaaq.

Tamanna pillugu siunnersuutip oqaluuserineqarnissaanut Demokraatit suleqataassapput. Tasiilami,



eqqaanilu suliffiit amerlanerunissaannik, periarfissat pitsaanerunissaannik, toqqissisimanerullu annertunerunissaannik kissaateqarnermut isumaqataavugut.

Demokraatit inassutigaat, siunnersuut Inuussutissarsiornermut Aatsitassanullu Ataatsimiititaliami nangillugu oqaluuserineqassasoq.